



**Tungaviusumik inatsisissaq pillugu isumalioqatigiisitap unitsinnissaa, kiisalu isumalioqatigiisitami sulinerup unitsinneqarnissaa pillugu Inatsisartut aalajangiineranniit atuutilersussamik Naalakkersuisut peqquneqassasut Inatsisartut aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Aqqalu C. Jeremiassen qujanaq siunnersuummut uunga.

Ilisimaneqartut Demokraatit Tungaviusumik Inatsisissaq pillugu isumalioqatigiisitap pilersinnissaanut akerliusimapput. Isuma qaratta – sulilu isuma qarluta – silatusaarnerujussuusimassagaluartoq aningaasat isumaginnikkut unamminartut aqqinnissaannut ator neqarpata soorlu meeqqanut tunngasunut. Pissusissamisoorporlu, inuiaqatigiit aningaasaqarniarnerat malunnaatilimmik pitsanngortittariaqaripput politikikkut namminiilivinnissatsinnut akissaqalissagutta.

Taakku saniatigut isumalioqatigiisitap pilersinnera sukkaavallaamik pisimavoq, kingunerisimallugulu, suliat malittuinnaq kinguaattoorneri. Taamatullu isumaqarpugut, isumassarsiatsialaasimangitsoq isumalioqatigiisitap annertuumik politikkerinik innutaqarnera. Akerlianik ilisimasalinnik sulisunillu, sukumiisumik suliarilluakkamillu siunnersuisinnaasunik inuttaqarsimasariaqaraluarpoq kingorna uatsinnit politikkerinit nalimmassarneqartussanik.

Taamatut oqareerluta, nassuerutigissavarput, Tungaviusumik Inatsisissaq pillugu isumalioqatigiisitap suliai Inatsisartuni ilaasortanit amerlanerusunik tapersorsorneqarmata. Taamaattumik qangarsuarli aaliangereersimavugut, suliamut sunniuteqaqataa nissarput, taamaattumillu isumalioqatigiisitap suliaanut peqataalluarput.

Upperinngilluinnarparput, amerlanerussuteqalerumaartoq, Tungaviusumik Inatsisissaq pillugu isumalioqatigiisitap atorunnaarsinnissaa, tamannalu tunngavigalugu kinguneqartussamik suleqataanerput ingerlatiinnassavarput.

Aamma paasivarput, isumalioqatigiisitamut aningaasarpaalunnik atuisoqareersimasoq. Taakku aningaasat annaaginnarneqassapput, maanakkut suliaq unitsissagaluarutsigu. Tamanna akuerineqarsinnaangilaq.

Akerlianik isumaqarpugut, tulluassasoq, inussiarnersumik aaliangersimasumillu isumalioqatigiisitap tuavisaarneqarpat aammalu suliassani naammassissagai. Sivisuallaamik utaqqereerpugut inerneranik takuniarluta, taamaattumillu Naalakkersuisut kajumissaarusuppugut Tungaviusumik Inatsisissaq pillugu



isumalioqatigiissitaq piffissamik suliaminik naammassinninnissaanut sivikitsuararsuarmik piffissaleqqullugu, pinngitsoorani malinneqartussamik.

Tamanna tunngavigalugu Demokraatit nalunaarutigissavaat siunnersuut taamatut iluseqartillugu tapersorsorinnaannginnamikku.